


synt 20 Joor derbyy



Hooseglunggi 2010

Stellet Eych das bildlig vor
Mir singen uffem Spaaledoor
Wien e Muezin im Goschdyym das wird heiss
Au das hett denn nimm sy Raiz
Kaine raucht me in dr Baiz
D Luft isch glar und me schmeggt nur no dr Schweiss
Ab nägscht Joor alli wäärdes see
Singe mir in corpore
Sicher nimm im Tabourettli
Mir seen is denn im Minarettli

Zem Schädel saisch in Baasel Biire
Uss dämm luege d Glugger fyre
Und e Schmeggschyt isch by uns aifach e Pfool
Mit den Oore kaa me loose
Mit dr Gosche duet me bloose
Und wenn zweeni Hiirni hesch bisch aifach hool
Wenn de hueschtisch haissts - y bälly
Und by uns isch das dr Lälli
By däre Clique geen die Junge
Und haisse nei - die gspaltene Zunge

Dr Miggel Tschäggsen fascht vergässe
Hett sy Gsicht jo loo ussmässe
X mool operiert är seet ganz anders dryy
Dass wuurd am Meerz doch au no basse
Well är duet sy Gsicht jo hasse
Hett är gsait am TV aber hindedryy
Wärs doch gscheiter s wuurd sich loone
Wemme nid do wuordi woone
Drumm goot är nid an Keeruusball
Als Gaddafi Hanniball

By dääne Bruetkäschte am Ryy
Geen doch kaini Veegel dryy
Sait dr Fäärimaa zem Ornitoloog
Dä luegt ans Ufer draht sich umme
Dä Witz isch wiider fir die Dumme
Die Käschte sin fir d Fisch das isch doch gar kai Froog
Dr Fäärimaa dä armi Droff
Schiittlet ungläubig sy Kopf
Sicher nid y glaub ych spinn
Das sin die neie Rettigsring

Dr Polanski vo de Poole
Sottme unschiniert versoole
Är isch uff jungi Maidli los das goot doch nit
Statt en Eerig und e Bryys
Hoggt är im Loch und fielt sich miis
Är darf erscht uuse wenn är 4 Millione git
Die Zyte sait är sin verbyy
Es mien hyt nimm so Jungi syy
Und laadet in sy Chalet
Zem Gebuurdsdaag s Trudi Gärschter yy

Das finde mir doch allerhand
Dr Henry nimmt dr Ball in d Hand
Dr Diego Maradonna isch sy Vorbild gsy
Dä Ball hätt niemools yne sette
Do druff duet nid nur Irland wette
Und Franggrych isch jetz an dr WM s macht my hii
Die schwarze Männer mit dr Pfyffe
Wänn das aifach nid begryffe
Statt vorem Yysatz ains go kiffe
Leend lieber Eyri Linse schlyffe
Dr Unggle Doggter duet jetz schimpfe
Worum hänn si sich nid lo impfe
S Bundesamt fir Gsunhait hett doch gsait si mien
Y ha denn gsait mi hänn si gsee
Well die Impfig duet soo wee
Und um s Loch wirds schyyns ganz schuurig blau und grien
Jetz nämds mi wunder was basiert
Kai Sau hett sich doo infiziert
Jetz isch die Pandemie verbyy
Und Pandemie hett nur d Chemie

Im Bundeshuus es wuurd is stingge
Laufen alli mit de Fingge
In dr Wandelhallen umme suscht machts lärm
Steggelischue das find y s schlimme
Und denn no die hooche Stimme
Frauepower isch jetz In in Bundesbärn
Hoffendig wird das kai Flopp
Waisch no by dr Elisy Kopp
Im Saal wird gstumme es git e Gmisch
Und d Helfti hoggt am Wiggeldisch

Dr Pabscht kaasch neierdings au gsee
Als Muusigstar uff DVD
Myni Oore rebelliere bi dämm Ghyy
Statt nur bätte au no singe
Was sell das denn au no bringe
Dr Vatikan bruucht Stutz - das isch do unser Gfyy
Mitere Popgruppe zämme
Miesst är sich doch nit so schämme
Wägem Zöllibat jetzt miend ir loose
Fusioniert är mit de doote Hoose

My Frau und ych sin 30 Joor zämme
Muess ych mi fir das scho schämme
Es git ai Grund zem zämme blyybe sisch bequem
Dr Tiger Woods sait zu de Fraue
Alli kenne mir verdraue
18 Loch pro Daag fir in doch kai Problem
Myni maint kumm ab ins Näscht
Und git mir zäärtlig noon e Schmutz
Kumm Alte nimm dy Schleegel fyre
Und mach fir mi dr Tiger Woods

Dr Klimawandel macht is zschaaffe
Schyynbar meerge das au d Affe
Si fliichten ussem Dschungel wells deert nimm so gygt
Dr Meeresspiegel stygt au aa
Und das nid nur in Afrika
Gwyssi Länder gits denn nimm well s Wasser stygt
D Holländer kenne nur no waarte
Bis si fääle uff dr Kaarte
Mit vyy Glygg mir wäärdes see
Stygt denn au dr Ziirisee

Wottscht au by uns bängggle ?
Schigg doch aifach e Brief in unser Boschtfach
VSG Postfach 4365 4002 Basel
Oder goosch uff, www.vsg-basel.ch
